

河南通志

河南通志卷之六十一

理學

天地古今理而已矣學不講則理不明講學以明理
啟前聖之橐籥作後學之津梁莫盛於有宋蓋自二
程子倡道伊洛一時從遊如李劉尹謝諸賢皆克衍
其緒迨及元明轉相師授中州理學之傳久而益振
雖立說間有差池或確守程朱或參良知之說要其
衛正斥邪守先待後皆本心得而身體力行非分門
樹幟斷斷焉務口說以角勝者

盛世敦尚實學崇禮先儒俎豆之典簡編之光也謹次講
學諸儒別爲一帙自北宋始志理學

開封府

明李承恩字君賜祥符人父母早喪祖父母鞠育之幼
不爲童戲八歲就塾師端慎如老成人弱冠入邑庠
爲弟子員督學使者優之俾聚講大梁書院正德十
四年領鄉薦明年試禮闈不第乃罄囊購理學諸書
以歸閉門潛玩時有心得見之著述辨析精當多先
儒所未發著易經大義詩經大義書經拾蔡學庸拾
朱孟子說若干卷又爲宋儒太極圖說定性書顏子
所好何學論西銘諸解以發其蘊平生著述甚富又
有河濱目錄劉記存稿若干卷事詳開封府志及中

皇清冉觀祖字永光中牟人康熙辛未進士官翰林院檢討請假歸里孜孜以倡明正學爲務時登封耿介潛心理學延爲嵩陽書院長俾之振聾發矇其爲學深造闢奧著述繁夥喫緊示人處尤在天理主敬一圖卒年八十餘雍正元年祀鄉賢

張伯行字孝先儀封人年七歲入小學恂恂恪恭有儒者氣象中康熙乙丑進士初授中書科中書舍人丁父艱回籍服闋以薦赴河工効力屢著勞績補山東濟甯道遷江甯按察司

聖祖南巡特授福建巡撫置社倉毀淫祠褒廉吏糾貪墨訪猾隸奸胥寔諸法教化大行閩故爲理學藪伯行建

鼇峯書院爲學舍百二十楹祀有宋五子選士肄業其中數躬蒞書院勗諸生以明體達用之學士子蒸蒸向風旋移撫江蘇辛卯科塲弊發疏劾督臣噶禮營私壞法禮亦馳疏訐參

聖祖鑒伯行清介仍予留任而黜禮伯行復任後建紫陽書院督課諸生越三年入署總督倉塲侍郎尋管理錢法補戶部右侍郎仍兼倉塲事

皇上御極眷注特厚

命專理戶部事每會議大政伯行多與焉尋陞禮部尙書乙巳以疾卒於官

上命鎮國公奠茶酒賜祭塋清恪伯行天性樸誠好學

不倦凡所設施皆本於實踐確遵程朱不惑異說嘗
慕陸隴其謂爲薛胡以後一人其論學宗旨如此雍
正七年

題請崇祀鄉賢

歸德府

宋程迥字可久寧陵人靖康之亂南徙餘姚登隆興元
年進士歷知進賢上饒數縣以恩義導民欺詐以革
暇則賓禮賢士進其子弟之秀者爲之陳說詩書質
疑問難無間蚤暮所著有古易考古易章句易傳外
編春秋傳顯微例目論語傳孟子章句等書卒官朝
奉郎朱熹以書告迥子絢曰敬維先德博聞至行追

配古人釋經訂史開悟後學當世之務又所通該非獨章句之儒而已曾不一試而奄棄盛時此有志之士所爲悼歎咨嗟而不能自己者然著書滿家足以傳世是亦足以不朽已絢巴陵尉能理冤獄孫仲熊亦有名

明魯邦彥字鄭卿睢州人七歲失怙出就外傳稍知經義卽以聖人爲可學被服造次不離儒者嘉靖己酉鄉試第一庚戌成進士授行人滿一考當選備侍從會嚴嵩柄國遲久不遷念母老遂疏終養杜門却軌潛心經術學以程朱爲宗務實踐不標榜爲名高隆慶改元臺省交薦起吏部主事改光祿丞俱不拜疏

陳十事皆鑿鑿可施行時執政內隙疏偶及之鄉人
留不果上見者以爲有經世之具所著有河圖洛書
說大學講中庸解就正錄皆平正精實多前人所未
發嘗語人曰中庸不可能也學之從捐介始通方之
人不足與議矣平生細行必矜非禮弗履卒年四十
有七巡按御史疏請從祀大梁總祠

徐養相字子存睢州人少工舉子業研究經傳解悟
疑譌復潛心性理曰爲學不宗濂洛非學也嘉靖己
酉登鄉薦丙辰成進士筮仕餘姚表章王氏之學與
多士朝夕講習三年興起甚衆陞兵部軍駕司主事
以守正不阿忤時相罷歸遂以明道淑人爲己任日

聚生徒講解經書性理遠近從學者常數百人號陶
錦水之間比屋皆絃誦聲平生事親極孝治喪一遵
古禮不用浮屠不讌弔客縉紳家多取法焉卒年七
十六所著有四書說略禮經輯覽近恒文集藏于家
事詳湯斌洛學編

呂坤字叔簡寧陵人離襁褓卽不妄言笑不與羣兒
嬉戲年十五五經皆通讀性理諸書欣然有會作夜
氣鈔拓良心詩立論專主躬行作省心記以自檢嘉
靖辛酉舉于鄉隆慶辛未捷南宮丁母憂萬曆甲戌
對策成進士初知襄垣襄垣劇尙嚴明繼調大同次
同貧尙撫字兩地均德之王家屏任吏部特疏擢吏

部主事故事新曹郎尙緘默卑伏不敢輕有可否
獨錚錚不少畏避出爲山東叅政後巡撫山西著實
政錄仕宦資爲模楷歷陞刑部左侍郎致仕家居講
學學者咸宗之稱爲沙隨夫子年八十三卒有去僞
齋集閩範四禮疑四禮翼交泰運諸書行於世卒贈
刑部尙書諭祭葬賜廕

王慕祥字承休睢州人原籍獲嘉因以獲嘉爲號性
至孝勵志讀書早以大儒自期年二十四入郡庠端
莊凝重履繩蹈矩對妻孥如賓客以移風易俗爲已
任嘗設壇集里中子弟講孝經小學風雨寒暑不愆
期纂釋聖訓五冊憲使通行各屬令老儒朔望登講

游其門者百餘人嚴立課程先德行而後文藝稍軼
卽嚴訶之人所行非義有潛自改悔者曰慮爲王先
生知也金忠節鉉父顯名爲郡學博鉉建言削籍省
親至郡見慕祥嘆曰伊川之流也令其諸弟皆從學
焉生平不輕有所撰著惟是究心王濂洛之學論議
頗多發明云

竇如珠字帝珍柘城人諸生早失恃事繼母以孝著
待異母弟敦友愛不私財器於辭受大節尤繩尺惟
謹人憚其剛方不敢以私干之而樂易平恕未嘗矜
世絕物處內外尊卑間怡怡如也平居教授講學從
遊甚衆衣冠必整步趨必嚴初不以顛沛流離稍失

禮容嘗與門人張震張益遇隴畔間師弟雍雍觀者
起敬其講求服習一遵程朱之訓不爲他說所惑有
語錄數十卷卒祀鄉賢

皇清湯斌字孔伯號潜菴睢州人自少卓立舉動尺寸年
十二聽里中耆儒王慕祥講小學侍坐終日無倦容
退卽見諸行事慕祥奇之年十六就傳郭外值流寇
陷州城斌母趙罵賊死後避亂三衢讀書山中念母
死節益自刻苦嘗中夜大哭哭已復讀山人皆感
動亂定始北歸順治戊子舉于鄉明年會試中式越
三年壬辰成進士改庶吉士鍵戶一室惟與魏象樞
曹本榮以理道相切磋乙未簡翰林科道官出任監

司斌得陝西按察司副使備兵潼關時關中多盜斌嚴行保甲令民各設鉦鼓砲石遠近以次傳警盜發輒得陞嶺北道叅政治所在贛贛四省上游地穹山深箐大盜李王廷窟穴其中斌用計平之贛人以安後以父老乞歸里居垂二十年潛心性命之學渡河執弟子禮於孫竒逢歸而充養愈邃屹然推中原巨儒戊午

詔舉博學鴻儒大臣交荐

御試甲等補翰林院侍講尋以日講官直

糾延敷陳詳盡深契

聖祖意超擢內閣學士兼禮部侍郎尋巡撫江蘇斌蒞任後

一以教化爲先痛除吳中積習禁服食玩好之不節者尤嚴絕補博及拳勇鬪毆禁婦女毋遊觀取五通神偶投于湖下令期於必行復親詣學宮命諸生講孝經俾幼穉皆得列坐以聽吳民翕然向風陞禮部尙書掌詹事府益被優禮每會推會議必問湯斌云何斌感殊遇凡是非可否必侃侃正言不耍不撓幾爲忌者所中尋轉工部尙書以疾卒于官訃聞

特命學士以潼酪奠馳驛護其喪歸予祭塋吳人聞斌卒皆號慟失聲斌於學無所不窺而一以忠孝誠正爲本其所著書不爲空言有洛學編一卷補睢州志五卷詩文若干卷明史稿若干卷行于世康熙四十年

祀鄉賢

竇克勤字敏修號靜菴柘城人壬子舉於鄉任南陽府泌陽縣教諭倣朱子白鹿洞規分立五社長各置勸善規過簿月朔稽善過而勸懲之每月初五日集耆年童子習禮儀稍長者解性理人皆興行戊辰登進士由庶常授檢討珥筆翰苑益肆力於經史尋以病乞歸居室狹隘捐貲修學宮葺朱陽書院士林多所成就勿嘗與睢陽湯斌嵩陽耿介往復商確互闡學旨所著有理學正宗孝經闡義尋樂堂家規泌陽學條規等書康熙四十七年祀鄉賢

彰德府

明崔銑字子鍾安陽人父陞以進士歷叅政清直著聲
銑資稟穎敏風骨岐嶷十歲從父授四書毛詩明年
從諸儒講太極圖周易弱冠舉鄉試入太學與四方
知名士秦偉馬理呂柟寇天叙馬卿張士隆相友約
明經修行毋慕高虛毋溺訓詁立志毅然洪治乙丑
成進士選翰林院庶吉士授編修正德初逆瑾竊柄
以不附已調南京吏部主事瑾誅召還史館晉侍讀
嘗侍經筵講說命因勸上去讒頑戒逸豫時錢寧等
在側甚銜之踰年引疾歸構後渠書屋董耕授徒意
泊如也世宗卽位用薦起修武廟實錄擢南京國子
祭酒時集議大禮損斥杖戍者相望銑上疏劾張璁

桂萼拾歐陽修之唾餘以承望意嚮世廟不悅又勸
上勤聖學辨忠邪以回天變自分必得罪遂致仕歸
田讀書洎上遠近從學者衆銳教以研經飭行曰道
在五倫學在治心功在慎獨家居十六年杜門著書
以闡道翼經爲志己亥東宮立慎選官僚召補少詹
事尋遷南京禮部右侍郎疾作致仕卒贈禮部尚書
諡文敏所著有讀易餘言中庸凡松窓寤言及刪定
二程遺書中說考晦菴文鈔鄴郡志文苑春秋等書
行世學者稱後渠先生

衛輝府

孫奇逢字啟泰文字鍾元本直隸容城人明萬曆庚